

Sajian ikan dan kambing baru

► **NURMAYA ALIAS**
nurmaya@sph.com.sg

**RESTORAN INDONESIA
KINTAMANI**
Hotel Furama RiverFront,
405 Havelock Road
Tel: 6739-6463

SUDAH 17 tahun lamanya Cef Iga Nyoman Kaler menyediakan hidangan berbuka puasa sepanjang bertugas di Restoran Indonesia Kintamani.

Namun, beliau tidak pernah jemu memasak makanan tradisional Indonesia. Ini kerana beliau berpeluang memperkenalkan juadah istimewa yang dicipta khas buat bufet Ramadan.

Sajian istimewa bagi berbuka puasa tahun ini ialah daging panggang betis kambing, ikan panggang siakap sambal, ikan panggang kakap merah dengan serai dan herba serta ikan panggang tenggiri sos kemiri.

"Menu tahun lalu tidak ada ikan dan kambing panggang," kata Cef Kaler.

"Saya mencipta resipi istimewa su-



CUKUP MENYELERAKAN: Rendang Daging Sumatera dari Restoran Indonesia Kintamani. – Foto RESTORAN INDONESIA KINTAMANI

paya pelanggan tidak datang sekali sahaja bagi makan bufet di sini tapi sekurang-kurangnya dua kali sepanjang Ramadan," ujarnya lagi.

Menurut Cef Kaler yang berasal dari Bali, kelazatan sajian istimewa itu terletak pada bumbu bahan segar.

Namun, pakar dalam masakan Indonesia itu berkongsi bahawa pelanggan

tetap Restoran Indonesia Kintamani juga selalu menantikan juadah kegemaran mereka setiap Ramadan.

Antara sajian popular Ramadan ialah rendang daging Sumatera, sup buntut dan ayam panggang kunyit.

Pelanggan boleh menikmati rendang daging Sumatera dengan hidangan lemak dan serondeng.

Selain itu, jelas Cef Kaler, pelanggan boleh menikmati pelbagai jenis nasi seperti nasi kuning, nasi jagung, nasi beriani dan nasi kebuli yang rasanya seperti nasi minyak.

Mereka yang lebih suka makan bubur sebagai pembuka selera boleh bermula dengan bubur surau atau lebih dikenali dengan panggilan bubur ayam di sini.

Memandangkan sesetengah masakan Indonesia pedas, Cef Kaler telah menyesuaikan masakannya itu mengikut selera pelanggan di sini.

Setiap santapan mesti disusuli dengan manisan. Lantas, puding betik merupakan salah satu pencuci mulut istimewa yang disajikan sebagai menu bufet Ramadan tahun ini.

Selain itu, pencuci mulut kegemaran seperti pisang goreng, pengat durian, ais bandung, ais cendol dan ais teler yang popular di kalangan pelanggan dihidangkan sekali lagi.

Tarikh: 29 Jun hingga 28 Julai

Harga: \$55/\$20 (dewasa/kanak-kanak)